

मार्निंग डोगरी न्यूज़ बुलेटिन, समें. 09.20 Hrs

<><><><><><>

Headlines

- मुखमंत्री उमर अब्दुल्ला होंरें JKSSB दे कम्मै-काजै दा जायजा लैता ते भर्ती प्रक्रिया च तेजी आहनने लेई आखेआ।
- सी.बी.आई नै जम्मू-कश्मीर दे साबका गवर्नर सत्यपाल मलिक ते 5 होरनें पर किरू पनबिजली परियोजना च भ्रष्टाचार गी लेइयै मामला दर्ज कीता ऐ।
- समाज कल्याण मंत्री सकीना इतू होंरें प्रधानमंत्री जन विकास कार्यक्रम तैहत परियोजनाएं दी अमलावरी दी समीक्षा कीती।
- मुख सचिव अटल डुल्लू होंरें जम्मू-कश्मीर च जरनैली शिड़कें सरबन्धी परियोजनाएं तैहत हासल प्रगति दा जायजा लैता।
- ते श्री माता वैष्णो देवी श्राइन बोर्ड आसेआ यात्रुएं दी सुरक्षा यकीनी बनाने ते उन्दे अनुभव गी होर बेहतर करने दे मकसद कन्ने Integrated Command ते Control Centre गी शुरू करी दिता ऐ।

<><><><><><>

CM-JKSSB Meeting

मुखमंत्री उमर अब्दुल्ला होंरें इक बैठक दी अध्यक्षता कीती ते JKSSB दे कम्मै-काजै दा जायजा लैता।

इस बैठक का मकसद भर्ती प्रक्रिया च आवारदी दिक्कतें-परेशानियें का हल कड्डना हा ते प्रक्रिया गी पारदर्शी बनाने दे कन्नोकन्नी समेंबद् तरीके कन्नै करोआना यकीनी बनाना हा। बैठक च मुख सचिव अटल डुल्लू .. दियां चेयरपर्सन इंदू कंवल चिब ते होरनें आला अधिकारियें हिस्सा लैता। इस दौरान इंदू कंवल चिब होरें 2019 थमां लेइयै हूनै तगर कीती गेदियां भर्ती गतिविधियें दी इक तफसीली रिपोर्ट पेश कीती। बोर्ड आसेआ एब्बी प्रस्ताव रक्खेआ गेआ जे भविक्ख च भर्ती आहले मतेयान सी.सी.टी.वी. दी निगरानी च करोआए जाने लोइचने तां जे पारदर्शिता ते निरक्खता यकीनी बनाई जाई सकै। मुखमंत्री होरें बोर्ड गी निर्देश दिते जे चयन प्रक्रिया च तेजी आहनन ते एहदे च आवारदी कुसै चाल्ली दी बी अइचनें गी तौले शा तौले दूर करन।

<><><><><><>

CBI-Malik

केन्द्री जांच ब्यूरो-सीबीआई नै जम्मू-कश्मीर दे साबका गवर्नर सत्यपाल मलिक ते 5एं होरनें जनें पर कीरू पनबिजली परियोजना च भ्रष्टाचार गी लेइयै मामला दर्ज कीता ऐ। बरे 2022 च जम्मू-कश्मीर सरकार नै कीरू पनबिजली परियोजना दे निर्माण च 22 सौ करोड़ रुपें दे ठेके च भ्रष्टाचार दी शेंका जतांदे होई सीबीआई जांच दी गुजारिश कीती ही। पिछ्छले बरे सीबीआई नै इस सरबंधे च दिल्ल ते जम्मू च 8एं थाहें पर छापेमारी कीती ही।

सीबीआई नै जेहड़े लोकें खलाफ मामला दर्ज कीता ऐ, उंदे च चिनाs घाटी बिजली परियोजना दे साबका अध्यक्ष नवीन कुमार चौधरी, परियोजना दे अधिकारी एम.एस. बाबू, एम.के. मित्तल, अरुण कुमार मिश्रा ते पटेल इंजीनियरिंग लिमिटेड दा ठेकेदार शामिल ऐ।

<><><><><><>

Sakina-Social Welfare

समाज कल्याण मंत्री सकीना इतू होरें सिविल सचिवालय श्रीनगर च प्रधानमंत्री जन विकास कार्यक्रम तैहत परियोजनाएं दी अमलावरी दा जायजा लैने आहली इक बैठक दी अध्यक्षता कीती। बैठक दौरान मंत्री होरें इस स्कीम तैहत प्रस्तावित परियोजनाएं बारे तफसीली जानकारी हासल कीती ते आखेआ जे इस स्कीम राहें अल्पसंख्यक समुदाय दे लोकें दा समावेशी विकास पक्क गै यकीनी बनोग। मंत्री होरें अधिकारियें गी हिदायत दिती जे ओह् इनें योजनाएं गी तैयार करने च लोकें आसेआ चुने गेदे नुमाइंदें कन्नै परामर्श करन तां जे इनें योजनाएं गी लोकें दी जरूरतें स्हाबै तैयार कीता जाई सकै। एहदे अलावा मंत्री होरें मुतलका डिप्टी कमिशनरें कन्नै तालमेल बनाइयै कम्म करने दे बी निर्देश दिते तां जे कम्में दा दोहरीकरण नेई होऐ।

<><><><><><>

Op. Sindoor

समूलचा मुख्य इनें दिनें आप्रेशन सिंदूर दी कामयाबी दा जश्न मना करदा ऐ जेदे तैहत पाकिस्तान ते पाकिस्तान दे नजैज कब्जे आहले जम्मू-कश्मीर च आतंकवादिएं दे 9 ठकानें ते सिखलाई कैंपें गी तबाह करी दिता गेआ हा ते 100 कोला मते खतरनाथ आतंकवादिएं दा सफाया करी दिता हा। लोक आतंकवाद खलाफ भारत सरकार आसेआ लैते गेदे रणनीतिक ते सख्त फैसलें दा बी सौआगत करा करदे न।

इस कामयाबी दा जश्न मनाने लेई जित्थे तरंगा रैलियां कड़्डियां जा'रदियां न, उत्थे गै समाज दे बक्ख-बक्ख वर्गे दे लोक बी भारतीय फौज दी इस कामयाब ऐतिहासिक कार्रवाई दी सराहना करा'रदे न। इस बारै आकाशवाणी जम्मू कन्नै गल्ल करदे होई मेजर जनरल रिटायर्ड Gurmeet Singh Shaan होरें आखेआ।

<><><><><><>

Announcement-Prog

आकाशवाणी जम्मू दे क्षेत्रीय समाचार एकांश ऑपेशन सिंदूर बारै 20 मिनंटे दी इक विशेष परिचर्चा प्रसारित कीती जा'रदी ऐ। इस कार्रक्रम च जम्मू कश्मीर सैनिक कल्याण मैहकमे दे निदेशक ब्रिगेडियर रटैर गुरमीत सिंह शान होरें अपने विचार सांझा करडन। एह विशेष कार्यक्रम 24 मई गी बड्डलै साङ्गे 9 बजे प्रसारित कीता जाग ते उन्दे नै गल्ल करडन स्हाङ्गे न्यूज एंकर विजय बजा। एह कार्रक्रम Medium wave 990 KH0/ 104.5 MH3 ते FM 100.3 पर सुनेआ जाई सकदा ऐ। तुस इस बारै अपनी प्रतिक्रिया ते सुझा rnujammu@gmail.com पर सांझा करी सकदे हो।

<><><><><><>

PM-MKB

प्रधानमंत्री नरेन्द्र मोदी होर औंदे ऐतवारें 25 मई गी आकाशवाणी पर प्रसारित होने आहले अपने महावार रेडियो कार्यक्रम "मन की बात" राए देश विदेश च रोहने आहले लोकें कन्ने अपने विचार सांझे करडन।

हर महीने दे अखीरले ऐतवार प्रसारित होने आहले इस कार्यक्रम दी एह 122मीं कड़ी होग। एह कार्यक्रम 25 मई गी बड्डलै 11 बजे आकाशवाणी ते दूरदर्शन दे समूलचे नेटवर्क पर प्रसारित कीता जाग। एहदे कन्नोकन्नी प्रधानमंत्री हुंदे दफ्तर, सूचना ते प्रसारण मंत्रालय ते आकाशवाणी समाचार ते डी.डी न्यूज दे यू-ट्यूब चैनलें पर बी मन की बात कार्यक्रम उपलब्ध होग। मन की बात दे हिंदी प्रसारण दे तुरत मगरा एहदा डोगरी भाषा च अनुवाद प्रसारित कीता जाग। एहदे अलावा तुस एहदा डोगरी अनुवाद इक बारी फी रातीं 8 बजे आकाशवाणी जम्मू पर सुनी सकदे हो।

<><><><><><>

CS-Roads

मुख्य सचिव अटल डुल्लू होरें N.H.A.I, N.H.I.D.C.L, Beacon ते प्रोजेक्ट सम्पर्क दे अधिकारिण कन्नै बैठक लाई ते इन्दे थवां चला'रदी परियोजनाएं दी ठोस ते माली प्रगति दी जानकारी हासिल कीती। बैठक दौरान अजें तगर हासिल प्रगति बारै जायजा लैता गेआ। मुख्य सचिव होरें आखेआ जे इनें परियोजनाएं पर नेइमी तक्क रक्खी जा करदी ऐ। उनें इन्दी हफ्ते स्हाबै रिपोर्ट तैयार करिए PWD भेजने ते समें-समें पर उन्दे दफ्तर बी भेजने लेई गलाया तां जे इनें परियोजनाएं दी नियमित तौर पर निगरानी होई सकै ते एह परियोजनां समें सिर पूरियां होई सकन ते इंदा लाह आम लोकें तगर पुज्जी सकै।

<><><><><><>

SMVDSB

उपराज्यपाल मनोज सिन्हा जेड़े श्री माता वैष्णो देवी श्राइन बोर्ड दे चेयरमैन बी हैंन, हुंदी हिदायत मूजब कटड़ा स्थित आयात्मिक विकास केंद्र च Integrated Command ते कंट्रोल सेंटर गी चालू करी दिता गेआ ऐ। एह गेंs श्रद्धालुएं दी सुरक्षा गी यकीनी करने लेई पुट्टी गेई ऐ। अपनी किस्मै दे ते अज्जै-कल्लै दिएं सुविधाएं कन्नै लैस इत्थे 700 सी.सी.टी.वी कैमरें दा नेटवर्क कायम कीता गेआ ऐ जेदे राहें मौके पर निगरानी यकीनी बनोग। फैसले लैने च सौख होग ते श्राइन आहले पूरे इलाके च सुरक्षा तंत्र बेहतर ढंगै सिर कम्म करोग।

<><><><><><>

LG-Book Release

उपराज्यपाल मनोज सिन्हा होरें साबका एम.एल.सी ते सीनियर बीजेपी नेता सुर्गवासी रमेश अरोड़ा हुंदा लिखे दा हिंदी कविता संग्रह “रूबरू” गी जारी कीता। उपराज्यपाल होरें रमेश अरोड़ा होरें‘गी रद्धांजलि भेंट करदे होई साहित्य च उन्दे अनमुल्ले योगदान गी चेता कीता। इस मौके पर राजभवन जम्मू च रमेश अरोड़ा हुंदे परोआर आहले बी मौजूद हे।

<><><><><><>

Div. Com Kheer Bhawani

जम्मू दे डिविजनल कमिशनर रमेश कुमार होरें इक बैठक लाइयै औंदे सालाना खीर भवानी मेले गी सुचारू ढंगै सिर करोआने लेई इंतजामें दा जायजा लैता।

इस मेले लेई श्रद्धालुएं गी जम्मू थमां भेजेआ जंदा ऐ। एहदे च जम्मू, रामबन ते उधमपुर दे डिप्टी कमिशनर हुंदे अलावा होरनें दुए अफसरें बी हिस्सा लैता। बैठक दौरान डिविजनल कमिशनर होरें सरबन्धी मैहकमे आसेआ कीते जाने आहले इंतजामें पर बी व्यापक चर्चा कीती। डिप्टी कमिशनर जम्मू होरें गी हिदायत कीती गई जे ओह जम्मू च इंतजामें दी दिक्ख-रिक्ख लेई मैजिस्ट्रेट तैनात करन। रामबन दे डिप्टी कमिशनर होरें गी आखेआ गेआ जे ओह चंद्रकोट च इंतजामें दा जायजा लैन जित्थे श्रद्धालुएं दे रूकने लेई बवस्था कीती जंदी ऐ।

<><><><><><>

Director-Agriculture

राई-बाई मैहकमे दे जम्मू निदेशक अरविंद्र सिंह रीन होरें रामबन जिले दा व्यापक दौरा लाया ते चला'रदे राई-बाई सरबन्धी जत्नें ते स्कीमें दी अमलावरी ते उंदी प्रगति दा जायजा लैता। अपने दौरे दौरान उनें रामबन दे मुख राई-बाई अधिकारी कन्ने बैठक लाई जिस दौरान उनें केंद्र ते केंद्र शासित प्रदेश आसेआ प्रायोजित स्कीमें तैहत होई दी प्रगति दा जायजा लैता। उनें जिले च राई-बाई दे महत्वपूर्ण ढांचे दा जायजा लैता। उनें खुम्बें दी पैदावार आहली इकाई, मखीर आहले प्लांट, एकीकृत राई-बाई सरबन्धी सरिस्ते दा जायजा लैता।

<><><><><><>

Announcement

आकाशवाणी जम्मू दे क्षेत्रीय समाचार एकांश आसेआ कठुआ जिले लेई अंशकालिक संवाददाता यानि पीटीसी लेई दरखास्तां मंगियां गेइयां न।

इच्छुक आवेदक जेहदी उमर 24 थमां 50 बरें दे बशकार ऐ ते ओह कठुआ जिले दा रौहने आहला ऐ, इस लेई आवेदन करी सकदा ऐ। मेदवार कश पत्रकारिता च पी.जी डिप्लोमा, डिग्री या कुसै बी पंजीकृत यूनिवर्सिटी थवां ग्रैजुएशन ते पत्रकारिता च 2 बरें दा तजुर्बा होना लोइचदा ऐ। मेदवार गी कम्प्यूटर पर खबर बनाने ते मीडिया कवरेज दे अनुभव सने सरबंभत लोइचदे उपकरणें वगैरा दा इस्तेमाल करना बी औना चाईदा। आवेदक जिला सदर दफ्तर दी 10 किलोमीटर दी हद्द दे अंदर-अंदर रौहदा होना चाईदा ऐ। दरखास्त ते लोइचदे दस्तावेजें दी कॉपी मेदवार गी क्षेत्रीय समाचार एकांश आकाशवाणी पंजतीर्थी जम्मू पिन कोड 180001 उप्पर 15 जून 2025 थवां पैहले-पैहले आइए दस्ती जमा करोआनी होग। इस बारे व्यापक जानकारी आकाशवाणी दी वेबसाइट www.newsonair.gov.in पर उपलब्ध ऐ।

<><><><><><>